

那文毅公三任陝甘總督奏議卷五十八目錄

卷五十八

籌備邊儲

興建義倉

懇恤民瘼

籌濟南河工需

變通徵草處分

那文毅公三任陝甘總督奏議卷五十八

男
容安恭輯

籌備邊備

道光四年閏七月十六日

奏爲籌補省會倉糧積貯以備急需恭摺奏

聞事竊甘省民貧地瘠戶鮮蓋藏省會要區倉儲之備

所係更重臣前任陝甘總督時省會因之地商賈

雲集食口浩繁而皋蘭額徵不敷供支兵糧尤需

採買省城以內旣無富實之戶倘有緩急竟無十

日之糧當於嘉慶十八年奏奉

諭旨准撥鎮番縣倉糧或十萬或五萬石專款封貯以備
不虞非遇急需不許擅動嗣經撥貯糧三萬八千
四百餘石因臯蘭疊遇偏災

奏請出借籽口將前項糧石已陸續動用無存而借
出之糧又緣遞年災緩尚未徵還以致現在倉儲
竟屬空虛近年甘省仰賴

皇上鴻福地方平靜年穀順成正當預籌積貯有備無
虞是方今政務莫要於此惟前項備貯之糧既已
借動無存倘遇緩急殊無足恃若此時仍籌撥鄰
邑之糧則又須陸運盤腳浩繁

國家經費有常未便輕議且恐地方官辦理不善轉
啟弊端臣再三籌計惟查臯蘭有嘉慶二十一二
四等年前督臣先福長齡節次奏明預買兵糧六
萬三千二百餘石除現在因該縣夏田受旱

奏請於此款內減糶十之三四外尙存糧數萬石此
項糧石如糧貴之年留備兵糧估撥尋常糧賤之
年不准動用現已曠貯多年未經支動合無仰懇
聖明指示卽於前項預買兵糧內將動缺備貯之糧照
數由此項撥還原款仍加意永遠封貯如遇急需
必須專摺先行奏明方准動用其尋常借糶等事

一概不許擅動動則勒令賠補永杜通融弊混之
漸俟歷年出借籽口陸續徵完卽補還預買兵糧
項下如此一轉移間於專撥之糧得以早歸實在
而預買兵糧仍然有糧抵補不致虛懸謹

奏

道光四年八月初四日奉

上諭那彥成奏籌補省會倉糧積貯一摺甘肅省城向
有專款封貯糧石嗣經出借籽種口糧陸續動用尙
未徵還自當預籌積貯以備緩急之需著照所請准
其在於預買兵糧項內按動缺備貯之糧照數補還

原款永遠封貯如遇急需奏明方准動用其尋常借
糶等事一概不准擅動動則勒令賠補以杜弊混仍
俟出借籽種口糧陸續徵完卽將預買兵糧之項照
數徵還

興建義倉

道光五年八月十八日

奏爲籌備各屬義倉以資儲備而濟荒歉恭摺奏

聞事竊維養民之政首重厚生而足食之原莫先儲積
矧甘省地居邊塞土瘠民貧年豐則不知蓋藏歲
歉則倍形困頓雖疊次仰蒙

恩旨借緩頻施而動輒仰給於官究未可恃爲常策查
甘省山多地曠氣候高寒暘雨稍不應時收成易
致減嗇而邊氓又拙於生計率以終歲所獲僅供
終歲之需但遇薄收除官爲接濟而外惟稱貸於

地方殷實之戶弱者不過倍息相通强者遂致聚
衆勒借甚而無賴奸民乘機煽亂竊搶地方官辦
理少有不善卽至滋生事端臣蒞甘三載刻思彌
患儲備之方乃邇年歲事欠豐未便輕言舉辦今
夏仰叨

聖主鴻福二麥普收秋禾亦稱大有自應乘時亟籌良
法以劑盈虛伏思常平定制出納維官社穀章程
例當取息求其以民濟民而一切仍可聽民經理
者莫若勸辦義倉最爲稱便查乾隆十二年間欽
奉

上諭勅令各直省查辦義倉曾經前撫臣黃廷桂奏明甘
省地方瘠陋一時驟難勉強請俟勸捐社倉充裕
後再行酌量辦理當蒙

允准嗣因未得舉行是以前督臣勒保於五十六七等年
奏報社倉糧數節經聲明甘省向無義倉各在案
竊思義社兩倉均係惠民善政原可相爲表裏第
甘省雖舊有社倉而當日立法未備捐數未充歷
年久貯在倉仍屬有名無實似應因時變通另設
義倉俾令積蓄饒多專爲備荒之用查甘省各廳
州縣通共七十餘屬內除安西玉門敦煌等處設

處關外情形與內地有殊似不必一律拘泥轉有窒礙其餘州縣雖地方饒瘠不齊而設法勸捐多寡總有裨益臣於夏收以後卽先捐廉買糧一千石並據藩司楊健捐糧一千石臬司蔡炯捐糧五百石蘭州道楊翼武捐糧四百石蘭州府知府桂明捐糧四百石臯蘭縣知縣李清傑捐糧四百石存貯省城公所以爲倡率隨飭所屬各就該處情形出示曉諭剴切勸導不限糧數不拘色樣不經胥吏紳監之手第置印簿數本分給四鄉悉聽民間量力捐輸無論貧富均弗稍事勉強並就其所

捐糧數分別予以獎賞查定例紳士商民捐義倉糧十石以上者地方官獎以花紅三十石以上者獎以匾額五十石以上者申報上司遞加獎勵如有尙義樂施數至三四百石者該督撫奏給八品頂戴等語此次勸令捐輸卽飭地方官查照辦理惟其間數至三四百石卽行奏給八品頂戴未免過優應俟捐至五百石以上再行酌量題奏商民給予頂戴職官給予議敘一有成數亦不必驟議建倉或就公所或賃閒房或覓廟宇中之潔淨空房懸掛某處義倉匾額就近存貯各處老成公正

殷實可靠之農民二人令充倉正倉副專司經理
一年無過照例給以花紅三年無過獎以匾額五
年無過免一身差役十年無過另行酌量優獎仍
嚴禁一應鄉保官人不准稍有干預其所存糧石
凡在有收之年毋庸春借秋還以免漸滋虧欠但
遇歉歲卽由倉正副稟明地方官察看輕重情形
詳報上司分別動用少歉之年或借給籽種豐收
後加息還倉或減價平糶糧賤時照數買補再歉
之年准借免息歉甚之年卽以此項糧石設厰煮
粥俾資賑恤仍俟成熟之時再行勸輸補足照舊

收貯如此因民利民庶以樂歲之有餘濟歉年之不足捐則出於樂輸用亦惠而不費似於備荒救歉之中猶不失閭黨相賙之義臣現與司道熟商至再議立條規復飭各屬一體遵辦去後茲據陸續稟報各道府率屬均已倡捐民情踴躍其間辦有成效者已得三十餘處所捐糧數自五六百石至一萬餘石不等並有捐輸銀一千餘兩錢二千餘串以爲買糧之用者其餘各廳州縣亦均在勸辦尙未報齊察其大局情形可望全行集事臣仍一面認真督勵隨在妥籌期於年內一律告蒧彼

時得有總共實數再行具摺奏

聞先將現在議定條規恭錄呈

覽伏乞

聖明指示俾飭各屬實力奉行並請嗣後每屆年終將
一歲收除動存各數目由各州縣開送藩司核明
詳報臣衙門彙總具奏一次事須專責可杜廢弛
而昭覈實務使法立可久利盡便民俾瘠苦邊氓
藉得其敦任恤之風咸獲含哺之樂庶以仰副

皇上惠愛元元厯念邊陲之至意至於勸捐州縣本屬
分所應爲惟念事經創始辦理亦費經畫且俱捐